

2013-imut Aningaasanut Inatsisissatut Siunnersuut

(Aningaasaqarnermut Naalakkersuisoq)

Akissuteqaat

(Aningaasaqarnermut Naalakkersuisoq)

Aappassaaneerinninneq**Aallarniut**

Aningaasaqarnermut Ataatsimiititaliap 2013-imut aningaasanut inatsisissatut siunnersuumik peqqissaartumik suliarinninneranut qujaffigerusuppara.

Aningaasaqarnermut Ataatsimiititaliap aappassaaneerinninnermut isumaliutissiisutaa

Naalakkersuisut suliamik ingerlatitseqqinnerminni nalilerniagaannik Aningaasaqarnermut Ataatsimiititaliap isumaliutissiisummini tallimanik kaammattuuteqarpoq.

Naalakkersuisut pingajussaaneerinissamut allannguutissatut siunnersuummik saqqummiusseqqullugit ataatsimiititaliami amerlanerussuteqartut Inuit Ataqtigiiit, Siumut Atassullu qinnuiginnipput, taamaalilluni 2013-imi partiit qineqqusaarnissaannut tapiissutinik immikkoortitsisoqarsinnaaqullugu. Tamanna Naalakkersuisunit tusaatissatut tiguneqarpoq.

Apeqqutinut arlalippassuarnut aappassaaneerinerup kingorna Naalakkersuisunit nassiunneqartussanut allakkatigut akissuteqartoqarnissaa Aningaasaqarnermut Ataatsimiititaliap qinnutigaa.

Paasisutissat aalajangersimasut 2013-imut aningaasanut inatsimmi inaarutaasumi imaluunniit 2014-imut aningaasanut inatsisissatut siunnersuummi ilanngunneqarnissaat allannguuteqartinneqarnissaalluunni Aningaasaqarnermut Ataatsimiititaliamit isumaqatigineqartoq isumaliutissiisummi arlalitsigut oqaatigineqarpoq.

Kissaatigineqartut 2013-imut aningaasanut inatsimmut inaarutaasumut naleqquttumik annertussusilimmik Naalakkersuisut ilanngutissavaat. Tamatumali peqatigisaanik Naalakkersuisunit erseqqissaatigineqassaaq 2014-imut aningaasanut inatsisissatut siunnersuut Naalakkersuisunit nutaanit suliarineqassamat aammalu Inatsisartunit nutaanit akuersissutigineqassamat. 2014-imut aningaasanut inatsisissatut siunnersuutip suliarineqarnerani manna Aningaasaqarnermut Ataatsimiititaliap oqaatigisai malitseqarteqqullugit taakkununnga piumasaqaateqarsinnaanngilagut.

Tamatuma saniatigut aningaasanut inatsit pillugu ataatsimiititaliap ataatsimut isumminnginnermini KNR pillugu pissutsit arlallit, meeqqat atuarfianni ukioqatigiiat marluiit, SAR-imik upalungaarsi-maneg, Illuut A/S aammalu efterskolernermut tapiissutit qulaajaaffigineqarnissaat Aningaasaqarnermut Ataatsimiititaliap qinnutigaa.

KNR-imut atatillugu Naalakkersuisunit paasissutissiissutigineqarsinnaavoq KNR-ip avataaneersunit misissuiffigineqarnerani ilaatigut isertitaqarfiusumik ingerlatsinissamut periarfissaq nalilerneqarpoq, misissuinerullu tamatuma inernerata decembarip qiteqqunnerani piareerneqarnissaa Aningaasaqarnermullu Ataatsimiititaliamut tunniunneqarnissaa naatsorsuutigineqarluni.

Meeqqat atuarfianni ukioqatigiiaanut marluinnut atatillugu Naalakkersuisunit paasissutissiissutigineqarsinnaavoq paasissutissat akissuteqarnermut tunngavigineqartut tassaasut Ilinniagaqarnerisuteqartitsiviup paasissutissaasivianit tigulaakkat aammalu ukioqatigiiaanit taaneqartunit atuartut 2008-mi meeqqat atuarfiannit anisut amerlassusiat pillugu Inerisaavimmit paasissutissat.

SAR-imik upalungaarsimanermut atatillugu Naalakkersuisunit paasissutissiissutigineqarsinnaavoq Kalaallit Nunaanni SAR-imi upalungaarsimaneq danskit naalagaaffianit akisussaaffigineqarmat. Kalaallit Nunaanni Namminersorlutik Oqartussat SAR-imik upalungaarsimaneq pillugu danskit naalagaaffiat sinnerlugu 2001-imilli Air Greenland isumaqatigiissuteqarfigisarpaat. Siunertamut tamatumunnga Namminersorlutik Oqartussat ataatsimoortumik tapiissutit aqutugalugit Danmarkimit ukiummoortumik 9 mio. kr.-inik pissarsisarput. Isumaqatigiissut taanna Naalakkersuisut atorunnaarsippaat aammalu 1. januar 2013-imit danskit naalagaaffiata SAR-imik upalungaarsimaneq nammineq qulakkiissavaa, tassunga ilanngullugu tamanna pillugu Air Greenlandimik aamma isumaqatigiissuteqarsinnaalluni. Danskit naalagaaffiannik isumaqatigiissummik Naalakkersuisut atorunnaarsitsinerisa kingunerisaanik Danmarkimit ataatsimoortumik tapiissutit 9 mio. kr.-inik ikilineqassapput. Tamanna pillugu Naalakkersuisut pingajussaaneerinissamut allannguutissatut siunnersuutinik saqummiussiniarput.

Illuut A/S-imut atatillugu Naalakkersuisunit paasissutissiissutigineqarsinnaavoq Illuut A/S-ip 2013-ip ingerlanerani taarsigassarsinissani sanaartornissaniluunniit naatsorsuutiginnimmagu. Taamaatumik Illuut A/S pillugu oqaasertaliussat siusinnerusukkut ilanngunneqartut ilanngunneqannginnerat Illuut A/S-ip ingerlanneqarneranut kinguneqassanngilaq.

Efterskolernermut tapiissutinut atatillugu Naalakkersuisunit paasissutissiissutigineqarsinnaavoq Danmarkimi efterskolernermut atuisut akiliutaat ukiumi kingullerni qaffakkiartuaarmata. Taamaatumik Kalaallit Nunaanni ilaqutariit isertitakinnerusut qitornamik Danmarkimi efterskolertiartinnissaannut aningaasalersuinissartik ajornakusoortittorujussuussavaat. Akerlianik Kalaallit Nunaanni efterskolernermut atuisut akiliutaannut tapiissutit ima inissititerneqarput ilaqutariit isertitakinnerusut atuisutut akiliuteqartinneqartarnatik. Taamaalluni Kalaallit Nunaanni efterskolit Danmarkimi efterskolinit annertunerusumik atuisunut akiliutinut tapiissutinik amerlanerusunik 2013-imi pissarsissapput. Siunnersuut aqutugalugu ilaqutariit isertitakinnerusut meeqqamik Danmarkimi efterskolertiartinnissaannut aningaasatigut aamma periarfissaqartinneqassapput.

Pingajussaaneerinissamut allannguutissatut siunnersuutit naatsorsuutigineqartut

2013-imut aningaasanut inatsisissatut siunnersuutip pingajussaaneerneqarnissaanut allannguutissatut siunnersuutinik arlalinnik nassitsinissartik Naalakkersuisut naatsorsuutigaat.

Siullertut akileraarutiniq allannortiterinissaq akuersissutigineqarpat akileraarutitigut akitsuutitigullu isertitat arlalippassuarnik allannortinneqartarinissaannik pisariaqartitsinermik kinguneqassaaq, soorlutaaq kommuninut ataatsimoortumik tapiissutit iluarsineqarnissaat pisariaqartinneqassasoq. Isumakkeerisarnermut maleruaqqusat suliffeqarfinnut atuuttut allannguutaat ukiuni arlalinni immikkut ittumik isertitaqartarnermik kinguneqassapput. Taakku aaqqissuussaannermit immikkut immikkoortitani immikkoortinneqarnissaat Naalakkersuisut siunnersuutigaat. Taakku suliffeqarnermi illuatungeriit kommunillu suleqatiginerisigut atugassiissutigineqartassapput. Aaqqissuussaannermit immikkoortitat atugassanngortinneqartarneranni pingaartumik 15-ini 18-inut ukiulinnut immikkut ittumik suliniutit aammalu suliffissaaleqisunik piginnaanngorsaaneq annertuumik pingaartinneqassasut naatsorsuutigineqarpoq, taamaalilluni suliniut siunissami suliffeqarnermi pitsannguutiniq kinguneqarsinnaaqqullugu.

Aappassaanik isertitat amerlinissaannik isumalluarneq tunngavigalugu allannguutiniq arlalinnik aningaasaliissutiniq kinguneqaataasussanik Naalakkersuisut inassuteqarniarput.

Ilaatigut Narsami Alluitsup Paanilu meeqqat atuarfiisa iluarsarneqarnissaasa 2014-imit 2013-imit siuartinneqarnissaa aammalu Ilulissani Atuarfik Mathias Storchip taartissaanut aningaasanik amerlanerusunik atugassiinissaq Naalakkersuisut inassutiginiarpaat.

Kontomi pingaarnermi 51.07.40-mi, Taarsigassarsiarititanut ernialersugaanngitsunut akilersuutitaqanngitsunullu tunngasumi aningaasaliissutit 2013-imi 3,6 mio. kr.-inik amerlineqarnissaat pillugu Naalakkersuisut inassuteqarniarput.

Missingersuutit B-t tunngavigalugit aalajangiinissamut tunngavissaqalernissap tungaanut aningaasanik suliniutiniq piareersaarnermut atatillugu atorneqartussanik immikkoortitsisoqarnissaa Naalakkersuisut inassutiginiarpaat. Sanaartornermi suliniutit aalajangersimasut aallartinneqarnissaat sioqqullugu suliniutiniq aningaasat atorneqartarnerisa ersarinnerulersinneqarnissaat allannguinermi siunertarineqarpoq.

Naggasiullugu nalunaarutigissavara aktiaateqarluni ingerlatseqatigiiffimmik Nuummi containerersorluni umiarsualivimmik nutaamik pilersitsinissamik ingerlatsinissamillu isumaginnittussamik pilersitsinissamut Aningaasaqarnermut Ataatsimiititaliap akuersissuteqarnerata kignorna aningaasaliinissamut Naalakkersuisunik piginnaatitsissamik oqaasertaliussamut allannguutissatut siunnersuummik Naalakkersuisut inassuteqarniarmata. Nuummi containerersorluni umiarsualivimmik nutaamik pilersitsinermut atatillugu Naalakkersuisut Inatsisartullu maanna oqaasertalisusamit iliuuseqarnissamut annertunerusumik periarfissaqalernissaat allannguutissatut siunnersuutikkut qulakkeerneqassaaq.

Taama oqaaseqarluni aningaasanut inatsit pillugu inersuarmi maani pitsaasumik anguniagaqarfiulluarmillu oqallinnissamut qilanaarpunga.